

ERA NOTÍCIA:

**VIELHA MILHORARÀ ES
SERVICIS DETH SÒN
MUNICIPI.**

Vielha milhorarà es servicis d'aigua deth sòn municipi.

Er Ajuntament de Vielha-Mijaran a començat era redaccion d'un estudi entà milhorar era infraestructura de forniment d'aigua en toti aqueri pòbles deth sòn municipi qu'an deficiències damb aguest servici.

Er Alcalde de Vielha-Mijaran Jusèp Calbetò explicquèc qu'aguest estudi servirà tà veir es lòcs a on manque aguest servici d'aigua tà poder préner un seguit d'actuacions. Er Alcalde remarquèc: "Era intencion d'aguest Ajuntament ei era d'oferir un servici corrècte e igual en toti es punts deth municipi".

Aguest Ajuntament tanben a començat un informe sus era depuracion des aigües residuas entà cercar solucions ad aguest problèma. Segontes eth Sr. Calbetò cau tier en compde que Vielha multiplique molt era sua poblacion enes caps de setmana e en epòca de vacances.

Es institucions informen:

**PROPÒSTES DETH CONSELH
COMARCAU DERA VAL D'ARAN
DAMB ETH DEPARTAMENT DE
CULTURA DERA GENERALITAT**

Eth Conselh Comarcau dera Val d'Aran elabòre ua propòsta de convèni culturau damb era Conselheria de Cultura dera Generalitat.

En linhas generaus serie aguest eth presupòst per partides:

- Relacions culturaus 1.988 1.989 damb 6 milions de pessetes.
- Normalisacion Lingüistica dera Val d'Aran damb 8 milions de pessetes.
- Difusion Culturau damb 3 milions de pessetes.
- Publicacions damb 4 milions e miei de pessetes.
- Patrimòni artístic damb 4 milions de pessetes.

Çò que pujarie un totau de 25 milions e miei de pessetes.

Era interlocutora tàs negociacions culturaus entre eth Conselh Comarcau e era Generalitat serà era Secretària Generau de Cultura, Sra. Gloria Riera e Alemany.

ACTUALITAT

LIMPIESA DETH BARRANC DE FONTFREDA PERA EMPRESA QUE HÈ ETH TUNÈL DE VENTILACION.

Se comence era limpie-sa de lordères deth barranc de Fontfreda en Vielha

Era empresa qu'a era concesion dera òbra dera galeria de ventilacion deth Tunèl de Vielha a començat a limpiar eth barranc de Fontfreda de totes es lordères e materiau trèt d'aguesta galeria e qu'auie anat a parar laguens deth barranc. Aquesta ei ua òbra que se harà per insistència der Alcalde de Vielha, que de non limpià-se aquest barranc auesse arturat es òbres dera galeria de ventilacion. Segontes

er Alcalde: "Aquest ei un barranc perilhós, ja qu'es dies de tronada e molta ploja pren un cantièr d'aigua fòrça important e poderie portar bèth desastre ath nòste pòble coma ja passèc ath començament de segle".

CICLE DE CONFERÈNCIES SOCIAUS EN ARTIES

Era Educadora de Carrèr Paloma Zavala organise un cicle de conferències sus tèmes sociaus en Arties. Tà escuèlher es tèmes passarà un papèr pes cases a on se poderàn mercar es tèmes mès interesants o ben proposà-ne d'auti.

Opinion

Sr. Director deth Noticiari Aranés Toti, aprofiti era seccion d'Opinion entà que vosté me publiquigue aquesta, era mia opinion sus eth tèma dera Escòla ena Val d'Aran.

En prumèr lòc me cau dider que sò deth Naut Aran, e era nòsta situacion geografica mos compòrte un tracàs fòrça important ara ora de hèr estudiar as nòsti mainatges en Vielha. Tròbi ua desacertada decision per part deth Collègi Garona er hèt qu'es mainatges que son de dehòra de Vielha passen dues ores entà meddia sense hèr arren, guardant-se en pati perque non pòden anar tà cap de lòc mès. Tanben me cau dider qu'es mès decidits passen aquestes ores caladi en complexe der "Elurra" N'i a d'auti que pugen a dinar enes sues cases practicant er "Auto-Stop" enquia qu'eth dia de molta nhèu o ben eth dia en que les prengue ena carretèra quauque conductor non massa expèrt, mos calgue plorar bèra desgràcia. Pensi que cau previer antes que guarir e de bèra forma vos convidaria as pares que vos trobatz ena mia situacion as mèstres que vedetz çò que passe en aquest Collègi e as autoritats que mos representatz en poder que i a fòrça e bones solucions entad aquest problèma.

Parlem-ne... Vos rebrembi que vau mès previer que guarir.

Maria

AUÉ PARLAM

Eth propèr dia 5 d'Abriu se torne a emèter un aute programa de "Era Lucana". Aué parlam damb Paco Boya entà demanà-li coma se hèr aquest programa.

- Guaire personas intervien ena elaboracion d'aquest programa e quin ei eth papèr de cada ua d'eres?

- En principi i a tres personas fixes qu'an un contracte damb television e son José Maria Castelha, Esperança Palop e Rosèr Faure. Dempús i a Olga Besolí que trabalhe de presentadora, Manolo Perailes que pòrte era camara e jo coma Director deth programa. A part de nosati tanben intervien es realizadors e montadors de Television en Barcelona.

- Coma hètz eth montatge d'aquest programa?

- En prumèr lòc auem ua setmana entà premanir eth guion, estudià-lo, contactar damb era gent

que i a d'intervier, eca., era setmana següenta mos dedicam ara grabacion, e era tresaua setmana vam tà Barcelona tà hèr eth montatge de totes es seqüències. D'aquesta tresaua fasse se'n cuede era realisadora qu'ei Rosèr, era sua ajudanta qu'ei Esperança e un tècnic de vidèus de TV2.

- De que tractarà eth propèr programa?

- Aquest programa se centre basicament en patrimoni museistic aranés e tracte de reivindicar era adquisicion deth còto Joan Chiquet de Vilamòs. Se veirà moltes vistes d'aquest còto e de Vilamòs. Tanben tracte deth cremat Espitau de Vielha damb un contraste de fotografies de çò qu'ère e coma a quedat ara; e coma celebracion der an d'emission de "Era Lucana", auem escuelhut es melhors imatges de cada programa tà tornàles a veir.

2au. TRIATLON BLANC INTERNACIONAU

Esport

2au. Triatlon Blanc Internacionau Val d'Aran

Eth dia 16 d'Abriu se harà eth 2au. Triatlon Blanc Internacionau Val d'Aran. Es pròves seràn es ma-deishes qu'er an passat. En lèr. lòc era corsa a pè qu'aurà ua longada de 7 Km. en un circuit urban entre Vielha e Betren. En dusau lòc, era corsa ciclista qu'aurà ua longada de 22 Km. e gesserà de Vielha enquia eth Plan de Beret. En 3au. lòc, era corsa d'esquí de "fondo" damb ua longada de 7 Km. e que se harà en circuit de "fondo" deth Plan de Beret.

Tàs prèmis i auràn diferentes categories: Prèmis dera Generau, e prèmis des diferentes pròves. Laguens d'aquestes classificacions se dividiràn en categories: òmes, hemnes e veterans.

En quan as inscripcions s'auente eth numerò en 100 participants mès qu'era edicion passada damb un màxim de 250 esportistes.

Tà inscriué-se vos cau adreçar ath Club Alpin Aranés, Avda. de Castièro nº 15, Apartat 112 de Vielha, Telf.: (973) 64 08 11 e 64 05 15.

R	E	R	A	T	A	M	O	T	S	U
A	M	E	M	B	N	A	A	T	U	I
E	O	U	T	A	E	N	E	E	D	E
M	N	A	A	D	E	C	C	L	O	N
T	G	A	B	C	T	A	E	U	T	H
B	E	L	E	T	A	R	R	A	B	A
A	T	P	L	O	D	R	E	C	R	U
H	A	E	H	R	U	O	N	J	O	A
C	M	O	A	P	I	T	L	P	O	L
L	E	I	T	U	G	A	I	T	E	B

**S
A
U
S
S
È
R

L
E
T
R
E
S**

TOTI
NOTICIARI ARANÉS

EDITE E IMPRIMÍS:

Centre de Normalisacion
Lingüistica dera Val
d'Aran.

Còto Saforcada, s/nº
tel.: 64 00 92
25530 V I E L H A


DEPÒSIT LEGAL:

L-1.328-1.987

Cercatz en aquest saussèr de letres
10 nòms de causes que se hèn en
uart.

CROTZAMENT DE MOTS

- 1.- Parlar sense contròl.
- 2.- Contrari de separat.
- 3.- Punt nere per a on passe era imatge.
- 4.- Sinònim de polida.
- 5.- Mainada, hemna,...
- 6.- Camin hèt ena nhèu tà poder caminar melhor.



SOLUCIONS ATH TOTI Nº 68

SAUSSÈR DE LETRES: Peu, dent, nas, pestanha, caishau, maishèra, paupeta, tèsta, pòt, celha.

CROTZAMENT DE MOTS: 1 Barrar, 2 adaiguar, 3 aganit, 4 ajudar, 5 bastir, 6 era.

Eth remoquet dera setmana

